

H a n s l u n d G r e t l

Nacherzählung

Wie sie der Vater uns Kinder

oft erzählt hat

Jungbauer Karl
vulgo Heiraffl Korl

Hansl und Gretl

Es is schou laung hea, do is mittn in Wold af a großn Bläß a Hajsln gstaundn. Dos hot an Hulzhocka gheacht, dea mit san Wei und sani zwoa Kina, doucht glejbt hot. Da Bua hot Hansl und s Mejnsh Gretl ghoißn.

Ums Hajsln uma is a Wies und a kloana Ocka gwejn. Af da Wies is Fuada fia a Kuah und a Kolm gwogsn und waun guadi Joah gwejn hand, hot s Fuada fia zwou Kiah glaungt. Van Ocka haums Ko'n, Eadäjpfl, Kraut und Ruam ghot. Jeds Joah haums zwoa Fa'l gfuadat und ejtla Hejna und an Gougschn haums ah ghot.

Da Vota is die meistn Tog in Joah in Wold gaunga, ea hot mit Oan va da aunan Seitn van Wold, doucht goawat. In Wold haums a Hittn ghot, do drin haums gejssn und wuns stoack grejngt hot oda a Wejda kejma is, hands drin intagstaundn.

D Muata hot dawal s Viah s Hajsln und d Kina vasoagt. Nua wenn vül zan toa gwejn is, ban Hejgn, Ko'nshnej, Eadäjpfl-grom und zan aubaun is iah Mau dahoam blim.

Af d Nocht non ejssn hot da Vota dazühlt, wias af da aunan Seitn van Wold ausschaut, wos a enta ban Mülitäa gsehgn und dalejbt hot, wos a va san Mitoawata Nejgs gheacht hot. In Winta hot a ah Gschichtn dazühlt.

Sou is oa Joah ums aunari dahi' gaunga. Sej haumd friedli glejbt, nua d Kina hand grässa won. Da Hansl is a afgwejkta Bua gwejn und d Gretl hot si ah guat au'gstült. D Muata hot in Hansl s Lejns, s Schreim und s Rechtna beibrocht und wia d Gretl sou weit gwejn, is hots ah mitgle'nt.

Wias af da aunan Seitn van Wold ausschaut, haums eascht gsehgn wias grässa won hand und afm Moakt mitgejh haumd deafm.

Wia da Hansl kräftiga won is, hot a i da Laundwiachtschoft mitghulfm und san Votan uwal meah Oawat o'gnumma und d Gretl hot da Muata i da Kuchl und in Haus ghulfm.

Za dea Zeit is a Bää i dejn Wold zuagwaundat. Die zwej Mauna haumd koa Frejd drau ghot. Fost je'n Tog uma ölfli is a kejma und hots i d Hittn triem, hot a Wal i da Wäjnd krotzt und hot si a Stund voa d Tia glejgt, maunchmol ah läjnga, danoh is a brummat wejg gaunga und die Zwej haumd weida oawatn kina.

Danoh is's Wejda schlechta won, s oa Joah haumd d Küah nit afgnumma und daun fost koa Mil gejm. S auna Joah is wejng Fuada gwogsn und do haums a Kuah vakafm miaßn, danoh haumd d Grupm d Eadäjpfl zaumgschlogn. A Joah danoh is s Ko'n nix won und s auna Joah haumd d Eachtflöh s Kraut fost zaum gfrejssn.

Sou is's kejma, daß in Hulzhocka und sana Famülie uwal schlechta gaunga is. Oft is a Joah mit an truckan Fruahjoah kejma, wou af da Wies nix gwogsn is, a Reif hot danoh ah nou d Eadäjpfl dafrecht und ba da Noacht is ihn a Faal hi'won.

Af d Nocht non Ejssn haums iwa dejs U(n)glick und di schlechti Zeit grejd und da Vota hot dazühlt, daß's in Wold ah nimma recht gejh wül, wenn ma an Bam nou sou genau umschnejn, wun a am folln is, kimmt a Wind und druckt'n af di auna Seitn, daß a i die Bam häjnga bleibt. Ouf miaßn ma uns iwa a Stund plogn, bis a liegt und mia weida oawatn kinan. Mia kimmts via, wia wenn uis vahext wa, i woas nit wias weida gejh sull. Wenn nit meah Fuada wogst miaßn ma nou d Kuah vakafm, guad daß d Kolm troagat is und bold a Kajwl griagt. "Vota wia was, wenn i is Doif umigang, vülleischt braucht a Bau an Knecht", hot da Hansl voagschlogn. "Hansl,

dos is gscheit, soat d Gretl draf und i gejh ah mit. Bestimmt braucht a Bau a kloani Dian oda wejm i d Kuchl, göl Vota dia is recht und d Muata wiad ah nix dagejgn hom". "Wenns moats, miaßt si's hult brouwian, soat da Vota draf, gfoln tuats ma grod nit".

Am aunan Voamittog haum si da Hansl und d Gretl afm Wejg gmocht, d Muata hot eah nou wos zan Ejssn mit afm Wejg gejm und hot eah noch gschaut, bis's da Wold vadejckt hot.

Bis zan Doif is's drei Stund zan gejh gwejn und uwal du'n Wold. Van Wejg haums nit vül gsehgn, ea hot ausgschaut wia a vawogsna Steig und schlecht zan gejh is a ah gwejn. Wias fost aus'n Wold außi kejma hä'n sulln is da Hansl u'ruahi won und wia na d Gretl gfroat hot, wos a hot, hot a iah gsoat, daß a si nimma auskejnnt und ea nit woäß, wous hand. Owa dos mocht nix, zeasch rost ma und ejssn wos, mia weam schou aussu kejma, amol heacht jeda Wold af. Wenns nit sou diesi wa und d Sunn scheinat, wissat i wia ma gejh miaßn. Danoh hands weida gaunga.

Stundnlaung hot si da Wold dahi zoug. Es is schou Nau-mittog gwejn, do hands af a Steigl kejma und af dejn hands weida gaunga. Noh an Wal is da Wold liachta won und noh a boa Stauna hands af a Liachtung kejma und voa an Hajs l gstaundn, wias nou koas gsehgn haumd. D Wäjnd aus Bisgwit und Oufmschä'l und s Dachl mit Lejzöln dejckt. Wal si nix griacht hot und uis ruahi gwejn is, hot si jeds va di Zwoa, a Stickl Lejzöln van Dachl obroucha und gejssn.

Af camol haums ausn Hajs l a Stimm gheacht: "Wea knuspat, wea kuspate an meinen Haus"? Di Zwoa haumd si gschrejekt und hand a Stickl wejg grejnnt. Noh an Wal, wia uis ruahi blim is, hands wieda zan Hajs l zruck gaunga. Wias hikejma hand, is d Tia afaunga und a olds Wei mit an vaschließna Gwaund, mit vastruwln Hoa und a gspitzatn Nos hot außa gschaut. Wias di zwoa Kina gsehgn hot, hots za eah gsoat: "Ah Kinajan, ejs habts is, wou weads dejn dos oldi Zeig ejssn, hobts an Hunga? Kejmmts eina, i gib ejng an Kafee und an Guglhupf". Da Hansl und d Gretl hand eini gaunga und haumd si's schmejka lossn, dabei hots dejs Wei ausgfroat. Van launga gejh hands mod gwejn und ban Tisch ei'gschlfm.

Dejs Wei is a Hext gwejn, in Hansl hots in Gäjnsstoll gspiacht und da Gretl hots a Kamal mit an Bejtt zan schlofm gejm.

D Gretl hot in Hansl s Ejssn bringa und iah ban Putzn, Koucha und Woschn hölfm miaßn. Noh a boa Tog is d Hext zan Gäjnsstoll gaunga und hot zan Hansl gsoat, ea sull an Finga außa stejcka. Da Hansl hot iah aus Jux a Boa'l außigstejckt. D Hex hot schlecht gsehgn und hots zwischn iahri Häjnd gwuzlt und wals zaudia gwejn is, hots gsoat: "Nul, Nul nou nit foaßt".

Danoh hot iah da Hansl jed's mol, wenns kejma is, a Boa'l außigsejckt und si hot si gwunat, daß a ba dejn guan Ejssn, wos a griagt, nit foaßt wen wüll.

Wal noh via Woucha, dejs Boa'l, wos fia an Finga holn hot, uwal nou zaudia gwejn is, hots ban wejggejh vull Grant gmuaamt: "Hiaz is ma gleich ob da Hansl foaßt is oda nit, moagn weans broon und af d Nocht, wenn die Aunan kejmmand gibts an Schmaus". Dejs hot da Hansl gheacht und wia d Gretl min Ejssn kejma is, hot a iah gsoat: "Die Oldi hot moagn mit uns wos voa, paß af, am bejssan is's du stüllst di recht u'gschickt au', wennst wos toa sullst, wos da vadächti viakimnt und bleib van Wossa und Fui' wejg".

Am aunan Tog hot d Gretl s Haus putzn miaßn, Wossa am Oufn

stülln und danoh Hultz in Bochoufm ahilejgn. Sie häts ah au'zindn sulln, hot si owa sou u'gschickt au'gstüllt, daß koa Fei' zaumbrocht hot. Do hot d Hex sölwa Fei' mocha miaßn und wias in Bochoufm richti brunna hot, hots in Hansl und Gretl zan Bochoufm mitgnumma und gsoat:

"Kinajan, hiatzt zoig i ejng wos schejs, do schauts eini, do segts in Himml und d Hüll.

Hansl sitz di am Brotschupfa afi, do kaunst is nou bejssa seha". Da Hansl hot si va da oan Seitn afi gsitzt und af da aunan Seitn ohifolln lossn. "Bist du a potschata Bua", hot d Hext gsoat, "Gretl sitz di du affi, du bist vül gschickta". D Gretl hot's wia da Hansl gmocht und is ah af da aunan Seitn ohigfolln. "Ejs habts owa u'gscickti Kina, schauts hea, sou mocht mas", hot d Hext gsoat und is af's Brejd van Brotschupfa afigsejssn. "Do schauts nua, da Himml und Hüll, is dejs schej, da Himml und Hüll - -", meah hots nimma sogn kina. Wias oum gsejssn is, hot da Hansl in Stül van Brotschupfa gnumma, d Gretl hot ban Bugl va da Hex au'gschoum und mit "Horuck" haums is in Bochoufm ahi gschoum und s Tial zuagmocht. Do host in Himml und Hüll, olds Luada, du frißt koani Kina meah und hiatz schaun ma, daß ma wejg kejman", hot da Hansl gsoat wias vabrunna is.

Bis in holm Naumittog hands gaunga, do is eah da Wold bekaunt viakejma. A Stund danoh hot da Wold afgheacht, af da Bläss is eahna Hajs l gstaundn und sej hand dahoamt gwejn. Wia da Vota van Wold hoankejma is, haums bis i d Nocht dazühlt, wos dalejbt haumd und si gfrejd, daß uis sou guad ausgaunga is.

Wias dumpa won is, hand va da Gejngt ummatum d Hexn, Oani noh da Aunan af da Bläss ban Hexnhajsl zan Schmaus zaumkejma. Sej haum si gwunat, wals die Old ninatzt gsehgn haumd. Wias eah zlaung daucht hot, hand si's suaha gaunga und wias is vabrejnt in Bochoufm gfundn haumd, haums gschrian: "Hui, hui unsa Oldi rejckt d Gika i d Hui", hand af iahri Bejsn gsejssn und i ulli Windrichtunga davou gri'n. I da Nocht is a Wejda kejma, a Blitz hot ejsgeschlogn und s Hexnhajsl mit ulln drumumma is vabrejnt. I dea Gejngd hot si koa Hex meah segn lossn.

I da Nocht hot's is tröjpfln augfaunga und dea woami Rejgn is uwal meah won. I da Friaht hot d Sunn gschejt, d Wies is grea gwejn und va die gfreachtn Eadäjpfl haumd greani Blattl außagschaut. Nua da Vota hot a trüabs Gsicht gmocht und gsoat, daß a hiatzt in Wold alloa is, wal sej Kolleg a aunani Oawat gfundn hot und nimma in Wold kimmt. Draf hot da Hansl gsoat: "Vota, i bin groß und stoak gnua, hiatzt kaun jo i in Wold mitgejh".

Am aunan Tog is da Hansl in Wold mitgaunga. Bis ölf i haums goawat, oft is da Bää kejma und sej haumd zwou Stund i da Hittn bleim miaßn. Eascht wia a wejg gaunga is, haums weida oawatn kina. A boa Tog danoh, sej haumd a boa Baam zan zaum-schnej ghot, is da Hansl nit recht ba da Oawat gwejn. A Wal hot a intasi ummatum, danoh vastuhln af d Baam afi gschaut und s Hackl hot a si uwal zan greifm hi'glejgt. Wia sa Vota gsoat hot, ea sull af d Owat schau und nit danejm umma, hots da Hansl af a Vöjglnejst gschoum. Da Hansl hot owa an Baam in Koupf ghot.

Nit weit va da Hittn is a schiefa Baam gstaundn. Af holwa Häh hand aus a Gowl sani zwej Groutzn weida gwogsn. Wias gejng Mittog in Bään kejma ghäacht haumd, is da Vota i d Hittn grejnt. Da Hansl hot d Hocka in Bauream gstejckt, is za dejn schiefm Baam hi' und bis za da Gowl afi kraxlt. Wia

sej Vota dejs gsehgn hot, hot a gschrian: "Hansl kim i d Hittn, da Bää krallt ah af Baam afi". "Geh eini und moch Tia zua", hot da Hansl zruck gschrian. Da Hulzhocka hot grad nou d Tia zuamocho kina, do is da Bää schou ba da Hittn gwejn und hot si voa d Tia glejgt. Da Hansl hot si, min Koupf oh, min Bau am Baam glejgt und mit die Fiaß i da Gowl oum fejst holn, hot d Hocka van Ream außa zoug und gwoacht, wos da Bää mocht.

Noh an Wal, wias in Hansl zlaung daucht hot, hot a Astl oghockt und zan Bään oh gwoafm. Da Bää hot i d Häh gschaut und wia a in Hansl gsehgn hot, is a laungsaum zan Baam hi gaunga und zan Hansl afikrallt, Protzn fia Protzn. Af dejs hot da Hansl nua gwoacht und wia a weit gnua oum gwejn is, hot a eahm eascht die oa Protzn oghockt und glei draf die Auna. Da Bää hot koan Holt meah ghot und is am schiefm Baam oh grutscht. Da Hansl hot mit die Fiaß auslossn, is nochi grutscht und in vulln Schwung, hot a in Bään d Hocka in Schääll ghaut, sou daß a noh a boa Brumma hi gwejn is.

"Hansl, Hansl, is da wos passiacht", hot da Vota aus da Hittn gschrian? "Na mia nit, owa da Bää is hi'", hot da Hansl zruck gschrian, "kim außa und schau dan au, ea tuat da nix meah". Da Hulzhocka hot zeascht voasichti ba da Tia außa gschaut. Is daun laungsaum zan Bään hi' gaunga und hot sin va ulli Seitn betrocht, dabei hot a gsoat: "Jo Hansl, wos toan ma hiatzt mit eahm, sou kinan ma nit liegn lossn, mia miaß na vagrom".

"A' wou Vota, mia trogna hoam, zuign eahm d Haut o und s Fleisch sölhans ma, sull fost bejssa sa wias Schweinani. Kim Vota mocha ma a Trogn".

In holm Naumittog hot d Muata ban Fejnsta außi gschaut, do hots van Wold wejm kejma gsehgn. "Jejssas, do is wos passiacht", hots daschrejekt gsoat, "Gretl schau du außi, du siagst bejssa". "Jo Muata, da Hansl und da Vota kejmand und dej trogn wos", hot d Gretl gsoat und a Wal draf hand die Zwej min Bään dahoam aukejma.

Die Zwou haumd vawunat in Bään betrocht, bis da Hansl gsoat hot: "Muata du brotst uns hiatzt d Protzn, dej sulln s Bejsti sa und mia Zwej fleiswerana hitzt aus und s Fleisch solzn ma ej' und sölhans, wia ba na Sau.

A boa Woucha draf hot da Hulzhocka san entan Kollegn trouffm, dejn hot a dos van Bään und uis Aunari dazühlt. Sou is inta d Lejt kejma. Dej hand nejgiari won und va di Junga is äjfta Oana i dejs Hajsle kejma.

A Zeit danoh hot d Gretl an Baunsuh gheirat und nit laung draf, da Hansl dejn sa Schwejsta.

Da Hansl is weida mit san Votan in Wold gaunga. Wenns a Hulz braucht haumd, haums a boa Baam am Rauf va da Bläss umgschnien und sou is d Wies und da Ocka uwal grässa won.

Mit die Joah haums a ejtla Kina griagt und haumd zfrieng glejbt.

Und wenns nit gstoam hand, lejms hejt nou.